

КЕЛІССӨЗДЕР НӘТИЖЕСІ ЖОҒАРЫ БАҒАЛАНАДЫ

Мемлекет басшысы Нұрсұлтан Назарбаев Халықаралық Аралды құтқару қорының құрылтайшы мемлекеттерінің басшылары отырысының қорытындысы бойынша бірлескен баспасөз мәслихатын өткізді.

Қазақстан Президенті журналистер мен ресми делегациялар мүшелерінің алдында сөйлеген сөзінде Түрікменстан Президентіне дәстүрлі қонақжайлық көрсеткені үшін ризашылық білдіріп, саммиттің жоғары деңгейде ұйымдастырылғанын атап өтті.

– Бұл кездесуіміздің әлемнің барша мұсылман қауымы үшін қасиетті Құрбан айт мерекесінен кейін өткізілуінің символдық мәні зор. Осы мүмкіндікті пайдалана отырып, бауырлас халықтарға бақ-береке, бейбіт өмір, амандық тілеймін, – деді Нұрсұлтан Назарбаев.

Мемлекет басшысы Арал дағдарысы адамзат тарихындағы ең ірі экологиялық апаттардың бірі болып саналатынын атап өтіп, 50 жыл ішінде теңіздің аумағы 9 есе кеміп, су көлемі 30 есе азайғанын айтты.

Жыл сайын Арал теңізінің кеуіп қалған ұлтананан желмен бірге 80 миллион тонна улы тұз көтеріледі. Бұл тұз шанды дауылмен Батыс Еуропадан Гималайдың шыңдарына дейін мыңдаған шақырымға таралып, адамдардың денсаулығына және елдеріміздің экологиялық жүйесіне зардабын тигізуде, – деді Мемлекет басшысы.

Нұрсұлтан Назарбаев Арал аймағының экологиялық жағдайын жақсартуға бағытталған Халықаралық Аралды қорғау қорының құрылтайшы мемлекеттерінің күш-жігерін қолдау үшін тараптардың осы проблемамен айналысатын дүниежүзілік қоғамдастыққа, Біріккен Ұлттар Ұйымына, барлық Қорлар мен банктерге жүргінені жөн деп тапқанын атап өтті.

Мемлекет басшысы су шығынын 50-60%-ке қысқартып, өнімділікті 4-5 есе арттыратын тамшылатып суару сияқты заманауи технологияның және суаруға қолданылатын суды үнемді пайдаланудың, экологиялық жағдайды жақсартуға септігін тигізетін әрі ауыл шаруашылығында малға жем дайындаудың көзі бола алатын, сондай-ақ тұздың көтерілуін болдырмайтын, тұзға төзімді жасыл көшеттер отырғызу мәселесінің маңыздылығын атап өтті.

Жиын соңында Мемлекет басшысы тараптардың су шаруашылығы, өңірдің су-энергетикалық және экологиялық аспектілері жөніндегі ұстанымдарын жақындастыру мәселелерін егжей-тегжейлі талқылағанын әрі Қазақстан өткен келіссөздердің нәтижелерін жоғары бағалайтынын айтты.

KEZDESU I

РУХАНИ ЖАҢҒЫРУ ЖЕТІСТІГІ – «100 ЖАҢА ОҚУЛЫҚ»

Елбасының «Болашаққа бағдар: рухани жаңғыру» атты мақаласында «Біз алдағы бірнеше жылда гуманитарлық білімнің барлық бағыты бойынша әлемдегі ең жақсы 100 оқулықты әртүрлі тілдерден қазақ тіліне аударып, жастарға дүниежүзіндегі таңдаулы үлгілердің негізінде білім алуға мүмкіндік жасаймыз. 2018-2019 оқу жылының өзінде студенттерді осы оқулықтармен оқыта бастауға тиіспіз» деді. Қоғамдық және гуманитарлық ғылымдар бойынша 100 жаңа оқулықты аудару ісі бір жыл бұрын басталып, 18 оқулық көпшілікке ұсынылған болатын.



Бейсенбі күні осы бағдарлама бойынша облыс әкімінің ұйымдастыруымен «Ұлттық аударма бюросының» атқарушы директоры Рауан Кенжетханұлы қатысқан «Жаңа гуманитарлық білім. Қазақ тіліндегі 100 жаңа оқулық» атты шара өтті.

Жиында облыс әкімі Қырымбек Көшербаев Мемлекет басшының «Болашаққа бағдар: рухани жаңғыру» атты бағдарламалық мақаласы қоғамдық санаға рухани сілкіні жасаған тың бастама болғанын жеткізді.

3-бет



Сыр бойы

№126-127
(19609-19610)
25 ТАМЫЗ,
СЕНБІ
2018 ЖЫЛ

ҚЫЗЫЛОРДА ОБЛЫСТЫҚ ҚОҒАМДЫҚ-САЯСИ ГАЗЕТ

1929 ЖЫЛДЫҢ 1 ШІЛДЕСІНЕН ШЫҒАДЫ

WWW.SYRBOYI.KZ



BÜGINGI SANDA

ЕСІЛДЕЙ
ЕСІП
АҚҚАН
ЖЫР

5 >>



ЖАНАР –
ЖАҒАРМАЙ:
БҮГІНГІ НАРЫҚ,
ШАРУА ҚАМЫ
ҚАЛАЙ?

6 >>



ҚАЙСАР
ҚАСИЕТ

8 >>

TAMYZ KEÑESI I

ҚҰНДЫЛЫҚТАР ТІЗІМІНДЕ БІЛІМ БІРІНШІ ОРЫНДА

Кеше Қызылордада «Төртінші өнеркәсіптік революция жағдайындағы адами капитал» тақырыбында дәстүрлі педагогикалық тамыз кеңесі өтті.

Шараға облыс әкімі Қырымбек Көшербаев, Қазақстан Республикасы Білім және ғылым министрлігінің жауапты хатшысы А.Өрсариев, «Назарбаев Зияткерлік мектептері» дербес білім беру ұйымының басқарма төрайымы К.Шамшидинова, Білім және ғылым министрлігі жанындағы ақпараттық тартау орталығы президентінің міндетін атқарушы Е.Нұрланов, жергілікті білім беру ұйымдарының қызметкерлері мен облыс мұғалімдері қатысты. Жиынға облыстық білім басқармасының басшысы М.Мелдбекева модераторлық жасады.

Тамыз кеңесінде облыс әкімі Қ.Көшербаев заманауи білім беру жүйесіндегі маңызды мәселелер мен проблемаларды атап өтті. (Баяндаманың толық нұсқасы газетімізде жарияланып отыр)

Одан әрі БҒМ жауапты хатшысы А.Өрсариев сөз алып, алдағы 20 жылдың ішінде автоматтандыру мен роботтандыру еңбек нарығындағы мамандықтардың 40 проценттен астамын өзгертетінін айтты. Сондықтан еліміздің білім беру жүйесінде бірқатар бастамалар жүзеге асуда. Балабақшалардан бастап оқу-тәрбие бағдарламаларына өзгерістер, білімді бағалаудың бірыңғай жүйесі енгізілді. Келесі жылдан бастап 0 класс тәрбиешілері мен мұғалімдерін дайындау басталады. Қазір базалық оқулықтар әзірленіп жатыр. Орта білім тармағын жаңартылған мазмұнға көшіру жалғасуда. Құжаттарды интернетке қосылмаған мектептерде ғана қағаз түрінде толтыруға рұқсат беріледі. Цифрландыруды дамыту үшін қосымша білім берудің мүмкіндіктерін пайдалану керек. Қазір көптеген қалаларда робототехника, бағдарламалау, 3D принтинг кластары ашылуда.

Жекелеген пәндерді ағылшын тілінде оқыту үшін педагогтар тілдік курстардан өтті. Олардың 5 мыңнан астамы осы оқу жылынан бастап сабақ беруге кіріседі. Министрліктің жауапты хатшысы балалар құқығын қорғау, кәсіптік, жоғары білім берудің сапасын арттырудағы жаңалықтарға тоқталды.

2-бет



Облыс әкімі Қырымбек Көшербаевтың тамыз кеңесінде сөйлеген сөзі

Қадірлі ұстаздар!
Әріптестер!

Алдымен Сіздерді келе жатқан Білім күні мерекесімен шын жүректен құттықтауға рұқсат етіңіздер!

Жыл сайын жаңа оқу жылы қарсаңында жас ұрпаққа білім мен тәрбие берудің көкейтесті мәселелерін ортаға салып, еркін ой бөлісу игі дәстүрімізге айналғаны белгілі. «Тамыз кеңесі» деп аталған осы алқалы жиында өткенімізге ой жіберіп, келешекке бағдар түзуді әдетке айналдырғаныбыз.

Бүгінгі әлемдегі өзгерістердің аса қарқынды жылдамдығын байқамау мүмкін емес. Мұндай жағдайда білім беруді болашақтың даму тенденцияларына бағыттау, жаңа экономика талаптарына лайықтау міндеті – бәрінен басымыз түсетін, баршаға ортақ аса маңызды миссияға айналмақ. Шындығына келгенде, біз балаларды қазіргі экономика үшін емес, келбеті енді ғана айқындалып келе жатқан мүлде жаңа, қатаң бәсекеге

негізделген, креативті (жасампаз) экономикалық ортадағы өмірге әзірлеуіміз керек. Сондықтан, уақыттан да оза жүруге жұмыс істеу қажет!

Яғни, біз ұзақ мерзімді перспективаны көздеп еңбек етуіміз керек! Жаңғырып жетілудің мүлде жаңа, мазмұндық және сапалық тұрғыдан бұрынғыдан бөлек, әлдеқайда биік сатысына көтерілуіге ұмтылған елімізге жасампаз, білікті, өзгерістерден қорықпайтын мамандар қажет. Бұл Елбасының тұжырымы, нақты тапсырмасы, білім саласын ұйымдастырушы Сіз бен Бізге аманаты!

Осы ретте, біздің ұдайы назарда ұстайтын ерекше маңызды көрсеткішіміз – түлектеріміздің жұмыспен қамтылуы. Расында, жас мамандар келешек кәсібіне сай, сапалы білім алып, мамандығы бойынша еңбек ете, құба-құп.

Алайда, нақты өмірде, көп жағдайда олай бола бермейді. Мойындау қажет, бізде бұл мәселеде келенсіздіктер аз емес. Түлектерді бір мамандық бойынша даярлай-

мыз, ал олар мүлде басқа саладан орын табады. Олардың қабілеті мен нарықтағы жағдайды ескере отырып, түлектерді дұрыс бағыттау – біздің міндетіміз.

Экономикадағы тенденциялармен, білім берудегі жаңалықтарға ілесі отырып, өзгерістерге лезде бейімделу, шұғыл да шапшаң әрекет ету – қазіргі білім беру жүйесінің ең маңызды қасиетіне айналды. Яғни, өзгерістерді өзімізден, басқару жүйесінен бастауымыз керек!

Сонда ғана біз ел экономикасындағы шұғыл өзгерістерге тез бейімделіп, ілесі алатын, жаңа замандағы өмірге бейім мамандарды дайындай аламыз.

Өзгерістерден тысқары қалып қоймауы үшін, басқару жүйесінің өзі жаңалықтарға бейімделе алуы шарт. Бұл барлық салаға қатысты, десек те, соның ішінде, білім беру саласы бірінші кезекте тұруы тиіс.

Баланың өресінен туатын адам капиталы, оның білімі мен өмір дағдыларын қалыптастыру – біз үшін бүгінгі күннің басты

басымдығы, экономикалық даму мен қоғам болып кемелденудің негізгі драйвері!

Өйткені, адами капитал – мұндай елде қандай да бір қажетті ресурстар, елдің дамуын анықтайтын шешуші фактор.

Қайталап айту артық болмас – ол XXI ғасырдың екінші жартысында елдің және әрбір адамның әл-ауқатының өсуінің, қоғамның дамуының негізгі факторы! Адами капитал, ең алдымен, білім беру саласы арқылы қалыптасады. Оны қалыптастырудағы білім саласының үлесі кез-келген басқа саладан әлдеқайда жоғары. Сондықтан да, бұл саланы әлеуметтік қамсыздандыру, зейнетақы жүйесі, мемлекеттік басқару, қорғаныс және қауіпсіздік сияқты шығынды көп талап ететін салалармен бір қатарға қоймай, керісінше, мол қосымша құн қалыптастыратын инвестициялық сала ретінде қарау қажет.

2-бет

SALTANAT I



ҚҰРЫЛЫСШЫЛАРҒА ҚҰРМЕТ

А.Тоқмағамбетов атындағы қалалық мәдениет үйінде құрылысшылардың кәсіби мерекесіне арналған салтанатты жиын өтті. Сала мамандары мен ардагерлерін облыс әкімі Қырымбек Көшербаев құттықтады.

– Құрылыс – адамзат баласы жер бетінде пайда болған ежелгі дәуірден келе жатқан жасампаз кәсіп. Құрылыс индустриясы – экономиканың негізгі іргетасы. Кез келген елдің экономикалық күш-қуаты мен әлеуметтік тұрақтылығы құрылыс саласының дамуына

тікелей байланысты, – деді аймақ басшысы. Сондай-ақ, өңірімізде құрылыс индустриясы қарқынды дамып, ел экономикасының, сонымен қатар тұрғындардың әлеуметтік әлеуетінің артуына айрықша ықпал етіп келе жатқанын атап өтті. Құрылыс саласының да-

муын Қызылорда қаласында және облысымыздың барлық елді мекендерінде салынған әлеуметтік нысандардан, тұрғын үйлерден, инфрақұрылымдық желілерден байқауға болады. Ауқымды саланы алға жылжытуда құрылысшылар қауымының еңбегі ерен. Миллиардтаған теңге тұратын ірі жобалар құрышқолды құрылысшылардың қарымдылығының арқасында жүзеге асырылуда. Заманауи мектептердің бой түзеуі, дене шынықтыру кешендерінің салынуы, инженерлік инфрақұрылымдардың құрылысы, жылдар бойы армандап келген тақтайдай тегіс жолдардың пайда болуы, бәрі-бәрі құрылысшылардың күн-түн демей атқарған еңбегінің жемісі.

Облыс әкімі құттықтау сөзінде бұл салада атқарылып жатқан жұмыстарға тоқталып өтті. Осы жылы облыста 41 әлеуметтік нысанның құрылысы жүзеге асырылды. Олардың 20-сын уақытылы қаржыландыру нәтижесінде пайдалануға берілді. Жыл аяғына дейін тағы он нысан пайдалануға берілсе, қалған 11-нің құрылысын келесі жылдың алғашқы жартыжылдығында аяқтау жоспарланған. Соңғы бес жылда 200 нысан салынды. Жалпы ауданы 2 млн шаршы метр тұрғын үй елімізде беріліп, 7 мыңнан астам қызылордалық қоныс тойын тойлады.

2017 жылдан бері Елбасы бастамасымен «Нұрлы жер» мемлекеттік тұрғын үй бағдарламасы іске асырылуда. Бағдарламаның мақсаты бұқара халық үшін тұрғын үйдің қолжетімділігін арттыру. Сонымен бірге 2018 жылдың басында

Президенттің бес әлеуметтік бастамасы жарияланып, қазақстандықтардың алдына өршіл мақсаттар мен міндеттер қойды. Облыста «Орда» жол картасы қолға алынды.

Қазіргі таңда Сырдария өзенінің сол жағалауында жеке инвестиция есебінен 18 көпқабатты үйдің, «Болашақ» университетінің кампусының, МЖӘ аясында 320 орындық балабақшаның құрылысы жүріп жатса, бюджет қаражатымен Жастарға қызмет көрсету орталығы және инфрақұрылымдық желілер салынауда. 2019-2020 жылдары бірнеше көпқабатты үйлер мен мектептер, көпсалалы аурухана, неке қию сарайы, балабақша, жатақханасымен бірге физика-математикалық мектеп, сауда және ойын-сауық кешенінің құрылысы жоспарланған. Ал Астана мерейтойына қызылордалық құрылысшылардың жасаған керемет тартуы Елбасы тарапынан айрықша аталып өтті.

Құрылысшы – ауыр да жауапты мамандық. Осы жасампаз әрі абыройлы мамандықты жастар арасында насихаттау жалғаса береді. Салтанатты шарада облыс әкімі үздік мамандар мен ардагерлерді Инвестиция және даму министрлігінің Құрмет грамотасымен, Алғыс хатпен, «Құрметті құрылысшы» төсбелгісімен марапаттады.

Шара барысында қатысушылар назарына Сыр құрылысшыларының ерен еңбегін баяндаған бейнефильм ұсынылды. Өнерпаздар ән-жырмен салтанат сәнін келтірді.

Бдырыс ТӘЖІҰЛЫ,
«Сыр бойы».

JIGER I



Қайсар ҚАСИЕТ

Сыр өңірінде мүмкіндігі шектеулі жандарға көмек көрсетудің айрықша үлгісі қолға алынған. Оның дәлелі ретінде жуырда ғана Қызылордадағы Кәсіпкерлер үйінде «Өзіңе сене баста» атты мүмкіндігі шектеулі кәсіпкерлердің өнімдерінен облыстық көрме-байқау ұйымдастырылғанын айтақ та жеткілікті. Байқауға «Кәдесый жасау» жобасымен Жаңақорған ауданынан қатысқан Қасиет Орал облыс әкімінің Алғыс хаты мен 1 миллион теңгеге ие болған еді. Бүгін осы Қасиет туралы сөз қозғамақпыз.

Әңгіме арқауына айналып отырған қаршадай қыз кәсіпкерлік жетіспеушілігіне байланысты бала кезінен шалт қимылдаса сүйегі сынытын сырқатқа шалдыққан. Осы себептен әкесі Қалдыбай Әбдіраманов пен анасы Қалипа Иманбаева қыздарының көз алдарында жүргенін қалайды. Қасиет денсаулығына байланысты үйде оқытылған. Оның қолынан келмейтіні жоқ. Жасаған кәдесыйлары көздің жауын алады. Әсіресе, қыз-келиндердің сәндік мақсаттағы әшекейлері көптеп табылады. Тіпті, төл туындыларын теңгеге пұлдан, сатып алған балабақша мен мектеп ұжымдары жетерлік. Оның өзі бұл өнерге деген қызығушылық арманға жетелеп бара жатқанын айтып.

– Арманым көп. Оқығым келеді. Тіпті, кәсіп ашып, мына ісімді әрі қарай дамытсам деймін, – деді ол бізбен әңгімесінде. Талантты қыздың өмірге деген құлшынысы талайға үлгі боларлық. Ол ғаламторға қарап отырып, түрлі пішінде жасалған әдемі дүниелерді іздейді. Тапқан бұйымды өзі жасап көреді. Бұл іске айрықша ықыласы ауып, бірте-бірте шеберлігін шыңдай түседі. – Алғашқыда уақытымды босқа өткізбейін деп ғаламтордан жылтыраған майда моншақтарды біріктіріп жасауды үйрендім. Ол кезде барлығы осылай алға басады деп ойламадым. Ата-анам үнемі қасымда. Әкем үй жағдайында жұмыс жасауға қажетті барлық затты тауып береді. Анам да қолынан келген көмегін аямайды, – дейді ол. Біз өз кезегінде Қасиеттің анасы Қатипа апайды да сөзге тартқан едік. Ол

жаппай кәсіпкерлікті дамытуға қолдау білдірген облыс басшылығына алғысын жеткізді.

– Қызымның қолынан келмейтіні жоқ. Көздің жауын алатын неше түрлі әдемі бұйымдарды жасайды. Тіпті, сурет те салады. Өзі болашақта дизайнер болсам деп армандайды. Құдай тілегін берсін. Біз оның жүріп кеткенін оқытып береміз, – деді ағиан жарылып.

Жылтыраған майда моншақтар мен гиіс, ермексаз, лента сынды заттар Қасиет қолданатын басты құралдарға айналған. Ол қызыл-жасылды күтудегі гүл мен ақ қарға орған ақ ұлпа ағаш, пластикалық құтыдан құрастырылған түрлі жан-жануарларды айныптай жасайды. Иә, талапшыл қыздың арманы биік екені көрініп тұр.

Бүгінде аймақта кәсіпкерлікті қолдаудың айрықша жобалары жүзеге асуда. Жыл басында жаппай кәсіпкерлікті дамыту, тұрғындарды жұмыспен қамту мәселелерін шешу және жалпы ішкі өнімді өсірудің маңызын арттыру мақсатында «Жаппай кәсіпкерлікті қолдау жылы» деп жарияланған болатын. Жартыжылдықтың қорытындысымен игі бастама үш жылға ұзартылды. Жоғарыда атап өткендей, Сыр жұртшылығы бұл бастаманың жемісін қазірден бастап көруде. Жемісті қадам көп жылға салынған із боларына сенім мол.

Әзіз БАТЫРБЕКОВ, «Сыр бойы».

AKTSIA I

Ауыз қуысында жиі кездесетін аурудың бірі – тіс жегі (кариес). Мұнда алдымен тістің эмалі үгітіледі де, содан кейін дентині ойылады. Сәбилердің сүт тістері, жалпы жас балалардың тістері жиі ойылады. Ал, мамандардың мәлімдеуінше, біздің елімізде ересектердің 80 проценти, тіс кариесіне ұшырайды екен.

«Сау тіс – ажарың» деп жатады көнекөздер. Әйтсе де, тісіміздің саулығын сақтауға келгенде көбіміз салғырттық танытып жататынымыз рас. Ең құрығанда жылына бір рет профилактикалық тексеруден өтіп, дәрумендер қабылдау да қаперімізге кірмейді. Сонан тек ауырып, ісіп, шарасыз жағдайда ғана дәрігер алдына барып жатамыз. Есесіне, тіс дәрігерлердің қолы жүріп, саудасы қызды. Сөйте тұра «тіс емдеу тым қымбаттап кетті» деп шағым айтып, ренжиміз. Осындай түсініспеушіліктің жиі кездесуі салдарынан тіс дәрігерлері бүгінде тұрғындарға аурудың алдын алудың маңыздылығын айтып, тіс жегісін болдырмауға кірісті.

Бұған жақинда жеке кәсіпкер, «Алма-Дент» клиникалар желісінің директоры, жоғары санатты стоматолог дәрігер, іскер әйелдер кеңесінің мүшесі Дүйсенкүл Тәжіқова ұйымдастырған «Тіс жегісінсіз өмір сүруге болады» атты акцияда күз болды.

Облыс көлемінде алғаш рет ұйымдастырылып отырған шараның мақсаты жоғарыда айтып өткеніміздей, тіс жегісін алдын алу, стоматолог дәрігерлерді ақпараттық-насихаттық шараға жұмылдыру, тұрғындар арасында ауруды болдырмауға ықпал ету.

Шараға қызылордалық стоматолог дәрігерлермен қатар, облыстық денсаулық сақтау басқармасының мамандары, «Атамекен» іскер әйелдер

Тәжіқова. Шынында, ауырып ем іздегенше, ауырмаудың жолын іздеген әлдеқайда арзанға түсері белгілі.

Тіс адамның ажары ғана емес, денсаулығының кепілі. Сондықтан отыз тістің қадірін сауында білгенге не жетсін. Ел.кз порталында тіске қатысты мынадай қызықты мәліметтер жарияланды. Сіз де біле отырыңыз.



ТІС ЖЕГІНІҢ АЛДЫН АЛУҒА АРНАЛДЫ

кеңесінің мүшелері шақырылды. Сондай-ақ, Алматы «Рада» дәрігерлік орталығы стоматология бөлімінің меңгерушісі, «Алтын дәрігер» төселгенінің иегері, жоғары санатты стоматолог дәрігер Елена Волобуева, «Диарис Глобал» компаниясының өкілі Светлана Матагулина қатысып, аталған тақырып бойынша сала мамандарына семинар-тренинг өткізді.

– Қазіргі кезде ең жиі кездесетін ауыз қуысы ауруларының бірі – тіс жегісін алдын алуға болатынын стоматолог дәрігерлерге де, тұрғындарға да түсіндіру, насихаттау өте маңызды. Бүгінде технологиялар дамып жатыр, сонымен бірге емдеу әдістері де, профилактикалық тәсілдер де жетілуде. Мүмкіндіктер мол. Қазір өздеріңіз білесіздер, стоматологиялық қызметтер бағасы күннен күнге көтеріліп жатыр. Осыған орай тұрғындар тарапынан реніштер туады. Негізгі қызмет ақысы дәрігерлерге қатысты емес. Себебі, тұтынытын заттарымыздың барлығы шет елдерден әкелінеді. Отаңдық өнім атымен жоқ. Ал шетелдік өнімдер доллар бағамына, басқа да жағдайларға байланысты өзгеріп отырады. Сондықтан біз аурудың алдын алу қажет деген ойға тоқтадық. Екі күндік шара барысында дәрігерлерге профилактиканың тың тәсілдері мен тіс жегісін емдеудің жаңа әдістері оқытылды, – дейді Дүйсенкүл

ғасырда Еуропада тістің сарғыш болуы санға айналған. Көпшілік сол кезде тістерін арнайы сары түспен бояған екен. Естеріңізде болса, бір кездері бізде де алтын тіс санға айналып, қазіргі аға буынның көпшілігі маржандай аппақ сүт тістерін бұзып алтынмен қаптаған еді ғой.

Адам тістері екі-ақ рет өздігінен өседі. Біріншісінде, 20 сүт тіс пайда болса, кейіннен 32 тіс шығады. Айтпақшы, «сүт тіс» деп алғаш болып Гиппократ атап кеткен.

Мына қызықты қараңыз, әлемдегі ең қымбат тіс – Исаак Ньютонның тісі. 1816 жылы 3300 долларға сатып алынған бұл тіс иесінің жүзегінен орын тапқан.

14 мыңға жуық емделушінің зерттеп-бақылаған жапондық ғалымдар, күніне тістерін 3 рет тазалайтын адамдар үлкен салмақпен сирек кездесетінін дәлелдеді.

Алғаш тіс щеткалары Қытайда 500 жыл бұрын пайда болған. Олар доңыздың түгін, борсық пен жылқының қылынан жасалған.

Қытайда 20 қыркүйек күні «Өз тістеріне махаббат» ұлттық мейрамы тойланады екен. Мүмкін тіс саулығына арнайы көңіл бөлетін, аурудың алдын алатын осындай бір күн бізге де керек шығар. Сіз қалай ойлайсыз?

Айнұр БАТТАЛОВА, «Сыр бойы».

«ХАРЕКЕТ» ҚОРЫ 26-ШЫ ОТБАСЫҒА БАСПАНА СЫЙЛАДЫ



«Харекет» қайырымдылық қоры мұқтаж жандарға баспаналы болуға жәрдемдесу мақсатында «1000 теңгеге баспана» атты акция өткізе бастады. Қоғамдық қор жұмыс істей бастаған 10 айда жиналған қаржыға еліміздің 26 тұрғыны баспаналы болды.

Жуырда аталған акцияның арқасында Шиелі ауданының тұрғыны Орынкүл Есжанова басбайлы баспанаға қол жеткізді. «Харекет» қорының мақсаты – халықтың демеуімен мұқтаж жандарға үй немесе жер телімін алып беру немесе баспана салуына көмектесу болып табылады. Төңкеріс ауылының тұрғыны, жалғызбасты ана, мүмкіндігі шектеулі Орынкүлге қор шешімімен Гигант ауылдық округі Бидайкөл ауылынан жер үй сатып алып берілді. Үш баланың анасы қуаныштан көз жасына ерік берді.

– Маған отбасымның жеке пәтері болатыны туралы хабарлағанда, қуаныштан төбем көкке жеткендей болды. Біздің баспаналы болуымызға жәрдемдескен барлық азаматқа шын көңілімізбен алғыс айтамыз, – деді Орынкүл Есжанова. Аристотельдің ғибратында ең биік игілік, қасиетті құндылық – ізгілік пен қайырымдылықты, адамгершіліктің өзегіне балайды. Өзгеге жақсылық жасай білу

– адамдықтың белгісі. Демек, адам болу қайырымды болу арқылы келеді екен. Яғни, адам өзінің мәні, қасиеті – адамгершілігімен, қайырымдылығымен қадірлі әрі абзал болмақ, – дейді ұйымдастырушылар.

– Бұл акцияның мақсаты – қазақтың ежелгі дәстүрі жылу жинауды жаңғыртып, соның есебінен мұқтаж жандарға үй немесе жер телімін алып беру, үй салуына көмектесу. Ең бастысы осы бастамамызды үздіксіз садақаға айналдыру. Баспана алуға атсалысқан барша ағайынның берекесі артып, бағы жансын, – дейді қор жетекшісі Алғабай Әбілғазыұлы.

Акция басталғалы бері он ай ішінде қазақстандықтар қордың шотына салған қаржыға 26 отбасы баспаналы болды. Сатып алынған үйлер жетім-жесір немесе мүмкіндігі шектеулі азаматтарға, көпбалалы және жалғызбасты аналарға беріледі.

Нұрбек ДӘУРЕНБЕКОВ, «Сыр бойы».



Меншік иесі
БАС ДИРЕКТОР
Аманжол ОҢҒАРБАЕВ
қабылдау бөлмесі
тел/факс: 8/7242/ 70-00-36
БАС РЕДАКТОР
Қуат ШАРАБИДИНОВ
қабылдау бөлмесі –
тел: 8/7242/ 40-02-17

Бас редактордың орынбасары – 70-00-43
Жауапты хатшы – 70-00-81
Бөлімдер:
руханият және ақпарат – 70-00-64, 70-00-41
экономика – 70-00-41, 70-00-68
әлеумет және саясат – 70-00-73
жарнама – 70-00-49, 70-00-52
есеп-қисап – 70-00-39, 70-00-38,
компьютер орталығы және корректорлар – 70-00-34

Газет аптасына 3 рет (сейсенбі, бейсенбі, сенбі күндері) шығады.
Газет Қазақстан Республикасының Мәдениет және ақпарат министрлігі Ақпарат және мұрағат комитетінде тіркелген.
Тіркеу нөмірі № 12993-Г, 27.08.2012 ж.

Қызылорда облыстық «Сыр бойы» газеті ҚР СТ ИСО 9001:2009 «Сапа менеджменті жүйесі» талаптарына сәйкес сертифицирталған.
Авторларға қаламақы тапсырыс бойынша төленеді, қолжазба өңделеді және қайтарылмайды. Жариялымыр газеттің түпкілікті көзқарасын білдірмейді.
«АК» - ақылы қызмет.

Газет редакцияның компьютер орталығында қатталып, «Сыр медиа» ЖШС өз баспаханасында басылды.
Тел.: 8/7242/ 40-06-68.
Газеттің таралымы бойынша 8/7242/ 70-14-08 телефон нөміріне хабарласуға болады.
Таралымы 28724
Тапсырыс №1352



ХАБАРЛАНДЫРУ
Қазалы ауданының Әйтеке би кентінде 2018 жылдың 1 қазанында қалаларлық «Қазалы Керуен» автовокзалы ашылды.
Автовокзал ғимаратының ішінде – сауда орындары, аумағында – сауда павильондары, техникалық жөндеу станциялары жалға (оның ішінде сатып алу құқығымен) беріледі. Қала-аудандық көлік-такси, микроавтобус көліктеріне автопарк бойынша сұраныс бірінші кезекте ескеріледі.
Байланыс телефондары: 8(7242) 26-37-87; 8 700 111 67 59; 8 702 224 31 33; E-mail: kazaly-keruen@mail.ru

Кезекші редактор Айдана ЖҰМАДИНОВА.